

Assalamualaikum wbt

Alhamdulillah, syukur kehardat Allah SWT dengan limpah inayah dan izinNya jua, kita masih lagi, diberikan kesempatan untuk terus berbakti dan meneruskan amanah serta tanggungjawab sebagai Khalifah Allah di atas muka bumi ini.

Sebagai insan yang bertawadhu' dan taat kepada perintah Allah, kita hendaklah sentiasa melaksanakan suruhan dan sunah sepertimana yang diajar oleh Nabi Muhammad SAW bagi meningkatkan darjat kita di sisi Allah SWT. Antaranya amalan yang sering diajukan adalah dengan menghidupkan kitab suci Al-Quran.

Al-Quran adalah kalamullah, yang merupakan mukjizat teragung Nabi Muhammad S.A.W yang masih kekal sehingga ke hari ini. Ianya menjadi panduan utama kepada seluruh umat Islam. Mereka yang membaca, memahami dan mengamalkan isi kandungan al-Quran, akan beroleh fadilat besar dan ganjaran pahala sepertimana yang telah dijanjikan oleh Allah SWT.

Alhamdulillah, berkat inisiatif yang diilhamkan oleh Kementerian Pengajian Tinggi, Yayasan Warisan Ummah Ikhlas, Kumpulan Karang kraf telah menghulurkan sumbangan wakaf Al-Quran sebanyak enam puluh satu set kepada UTeM.

Menerusi wakaf Al-Quran yang diterima ini, UTeM telah mengagihkan Al-Quran tersebut kepada semua fakulti, Kolej Kediaman Pelajar, Masjid, Surau, Pusat Persatuan Pelajar, dan beberapa pejabat untuk diimarahkan oleh semua warga UTeM.

Saya menyeru kepada semua pihak yang menerima sumbangan wakaf Al-Quran ini, untuk mewujudkan sudut quran ataupun Quran Corner di lokasi-lokasi yang bersesuaian, supaya wakaf Al-Quran ini dapat dimanfaatkan dan diamalkan oleh warga UTeM dengan sebaik-baiknya.

Apatah lagi, bersempena dengan bulan Ramadhan yang penuh keberkatan dan kemuliaan ini, amalan membaca Al-Quran serta tadabbur atau menghayati Al-Quran menjadi tuntutan kerana dijanjikan dengan ganjarannya yang berlipat kali ganda.

Akhir kata, semoga Allah S.W.T mengurniakan kepada kita semua sifat cintakan al-Quran dan seterusnya mengurniakan kepada kita semangat untuk sentiasa melazimi al-Quran di dalam kehidupan kita, tanpa mengira masa dan tempat, agar di hari akhirat kelak, al-Quran akan datang kepada kita sebagai pembantu dan pemberi syafaat kepada kita. Insya Allah.

Justeru, saya ingin mengajak muslimin muslimat warga UTeM sekalian untuk bersama-sama membaca dan menghayati Al-Quran Kareem. Warga UTeM, warga cintakan Al-Quran. 😊